

Transkription von Urkunde HRO 1386b

Ort, Datierung: Rostock, 1386-12-06

Signatur: Stadtarchiv Rostock, U 3, B, Vorstädte U 3d Riekdahl 1386 Dezember 6 [\[online\]](#)

Inhalt: Johan Bereke: Quittung Gutsverkauf

Bemerkung: anderes Datum: 06.12.1386

Ik johan bereke borgher to rozstock bekenne vor my vnde myne eruen vnde dō witlik allen lūden . de dessen yeghenwardeghen bref seen . edder / hören lesen . vnde betūghe openbare in desser scrift dat ik myt vulbort Elzeben myner husurowen . vnde alle erer neghesten vrūnde . mit wol be/radenen mōde hebbe vorkoft vnde ghelaten vnde vorkope vnde late in desseme yeghenwardeghen breue . den erbaren mannen Borghermesteren / vnde Ratma(n)nen der stat to Rozstock vnde eren nakomelinghen in deme suluen rade vnde den borgheren to rozstock Teyndehalue hōue(n) in deme / dorpe ryctalendorpe also also se lygghen in allen enden erer schede mit allen eren tobehorynghen mit aller nut , mit aller bede mit alleme denste . / it sy perde denst . waghen denst . edder wo de denst ghenomet sy . mit alleme rechte vnde rechtecheyt . mit alleme eghendōme . vnde vryheyt . also also / it werneke witte borgher to rozstock , wandaghes elyken man Elzeben miner husurowen vorbenomet van her johanne van deme bomgarden wanda=/ghes borghermestere to rozstock alder vrygest to pande ghehat vnde beseten heft vnde mit der lenware ener vicarie . de de vorbenomde her johan / van deme bomgarden in dat sulue gud ghemaket vnde ghelecht heft vnde mit alle deme rechte also it my Johan bereken vorbenomet myt / myner husurowen Elzeben vorbenomet na deme dode eres mannes . wandaghes werneken witten in rechteme erue to gheuallen is . vor drehun=/dert mark rozstocker pe(n)nynghen . de se my wol to danke vnde nūghaftighen beret vnde betalet hebben . vryelken vnde vredesamelken to eweghe(n) / tyden to hebbende vnde to besittende dat vorbenomde gud mit allen vorscreuenen vnderschedynghen sunder myne vnde myner erue(n) vnde vrunde / bewernisse vnde hinder . also vry . also it her johan van deme bomgarden guder dechnisse to voren van den heren van deme lande vnde werneke / witte vnde ik dar na alder vrygest vnde vredesamelkest ye ghehat vnde beseten heft vnde hebben . vnde scullen aller breue de vppe dat vorben(omede)¹ / gud to rictalendorpe ghemaket gheuen vnde sprekende synt to behoef der stat to rozstock to eweghen tyden in aller mechticheyt brukende / wesen in aller mate vnde wise alze werneke witte eft he leuede . Edder ik vnde Elzebe myn husurowe vorbenomet vnde myne eruen der suluen / breue bruken mochten . vnde hebbe des to tūghe myn ynghezeghel henghet laten an dessen yeghenwardeghen bref . de gheuen vnde screuen is / to Rozstock na Godes bort drutteynhundert iar in deme sos vnde achtenteghesten iare in sunte nycolaus daghe des hilghen bisscoppes /

¹ Abbreviatur entweder nur schwach und daher kaum zu sehen, oder keine Abbreviatur vorhanden